

Drugi pišu: Mehanović smijenjen zato što nije htio promijeniti stranački dres!?

Vlada Tuzlanskog kantona (TK) na jučerašnjoj sjednici smijenila je Amela Mehanovića s pozicije direktora Kantonalne uprave za inspekcijske poslove u Tuzli. Kao razlog ovakve odluke navedeni su loš poslovni rezultat i nepridržavanje akata Kantonalne vlade, što je Mehanović kategorično negirao, navodeći da je pozadina njegove smjene političke prirode, odnosno njegov stav da se ne priključi nedavno osnovanom Pokretu demokratske akcije (PDA).

To saopćenje prenijela je većina medija, a nakon toga Klix.ba je objavio Mehanovićevo pismo u kojem tvrdi da je smijenjen iz političkih razloga. Prenosimo ovaj tekst u cijelosti.

Mehanović je u otvorenom pismu upućenom redakciji portala Klix.ba naveo da je Vlada TK izvještaj o radu Kantonalne uprave za inspekcijske poslove za 2017. godinu jednoglasno prihvatila 27. marta 2018., a kako tvrdi, lani su postignuti i najbolji rezultati od osnivanja ove uprave po pitanju smanjenja sive ekonomije, broja poduzetih upravnih mjera, izdatih prekršajnih naloga i zatečenih radnika nacрно.

“Isti izvještaj prosljeđen je Skupštini TK koji je bio uvršten u dnevni red sjednice 26. aprila 2018. ali je na prijedlog premijera TK Jakuba Suljkanovića skinut. Obrazloženje je bilo da je to učinjeno ‘iz tehničkih razloga’. Vlada i Skupština TK nikada nisu zatražile nikakvu doradu, niti neko objašnjenje, pa je jasno, što će kasniji postupci i potvrditi, da je ustvari razlog ‘političke prirode’”, kaže Mehanović.

“Tražili su mi da podržim PDA”

Mehanović dalje tvrdi da su nakon toga počeli politički pritisci na njega u smislu da se priključi i podrži novi politički projekt u TK, odnosno PDA.

Kao što je poznato, PDA je nastala nakon žestokih unutarstranačkih sukoba u Stranci demokratske akcije (SDA), a koji su između ostalog rezultirali smjenom Mirsada Kukića s pozicije predsjednika Kantonalnog odbora SDA u TK, a nakon toga i smjenom kantonalnog premijera Bege Gutića te uvođenjem povjereništava u kantonalne i općinske odbore stranke.

“Često sam bio pozivan od premijera TK (Jakuba Suljkanovića, op.a.) i predsjednika Skupštine TK (Senada Alića, op.a.) s različitim zahtjevima, u vezi s podrškom navedenoj političkoj opciji (PDA, op.a.), a i drugim zahtjevima, što ću iznijeti i predložiti s dokazima Tužilaštvu TK i drugim institucijama BiH. Nakon što nisam pristao na ucjene od navedenih i što nisam htio raditi po direktivi nijedne političke stranke, niti pojedinca, nego samo po zakonu, na sjednici Skupštine TK 31. jula 2018. izvještaj o radu Kantonalne uprave za inspekcijske poslove nije prihvaćen bez bilo kakvog objašnjenja, iako su poslanici vladajuće strukture isti izvještaj podržali na svakoj skupštinskoj komisiji jednoglasno”, tvrdi Mehanović.

Naglašava da je neistina da izvještaj nije prihvaćen zbog loših poslovnih rezultata.

“Vlada je u augustu 2018. donijela Odluku o načinu razrješenja direktora uprava prije isteka mandata i istu primjenjuje retroaktivno na neprihvatanje izvještaja, jer u nedostatku argumenata očito moralo se odlučiti na takav pravni nonsens”, nastavlja smijenjeni direktor Uprave za inspekcijske poslove TK.

Zbog političkih pritisaka otišao na bolovanje

Kako tvrdi, nakon što više nije mogao izdržati pritisak vladajućih struktura iz PDA obratio se porodičnom ljekaru 20. augusta ove godine i od tada se nalazi na bolovanju.

“Vlada je odmah zatražila da joj dostavim izvještaj o radu Kantonalne uprave za inspekcijske poslove za prvih šest mjeseci rada u 2018. godini, nakon čega sam uputio dopis premijeru TK s dokazima nadležne zdravstvene ustanove da sam privremeno spriječen da obavljam poslove zbog bolovanja. Međutim, premijer TK mi se pismeno obratio i naveo da on to ne smatra opravdanim razlogom za nedostavljanje izvještaja, vjerovatno time želi da mi onemogući i pravo na bolovanje i to je iskoristio kao jedan od razloga za moje

razrješenje”, nastavlja Mehanović.

Ističe i da su rezultati rada inspekcija TK za prvih šest mjeseci ove godine najbolji te da su dokumenti na mjesečnom nivou dostavljani nadležnim ministarstvima.

“A ako uzmemo u obzir da je Vlada TK nakon mog razrješenja imenovala za v.d. direktora osobu koja se nalazi na listi PDA za Skupštinu TK za predstojeće izbore, onda je jasan i nedvojben razlog moje smjene”, kaže Mehanović te zaključuje da nikada nije bio, niti će u budućnosti biti dio montiranih inspekcijskih kontrola. (A.K.. Klix.ba)

60

SHARES

[_ Share on Facebook](#)

-
[_ Tweet](#)

-
-

[Follow us](#)

-
[_ Share](#)

-
[_ Share](#)

-
[_ Share](#)

-
[_ Share](#)

-
[_ Share](#)

Date: 13-09-2018